

Acta da Xunta de Goberno correspondente ó 27 de febreiro de 2015

No Pazo da Deputación Provincial de Ourense, o vinte e sete de febreiro do ano dous mil quince, ás dez horas, reúnese a Xunta de Goberno da Deputación baixo a presidencia do titular don José Manuel Baltar Blanco, presidente da mencionada Deputación -que como tal é da Xunta-, cos deputados, don Rosendo Luis Fernández Fernández, don Plácido Álvarez Dobaño, don José Antonio Feijóo Alonso, don Francisco Rodríguez Rodríguez, don José Manuel Freire Couto, don Emilio José Pazos Ojea, don Antonio Montero Fernández e don Eladio Mangana Nóvoa, os que constitúen a maioría absoluta da devandita xunta, co fin de celebrar sesión ordinaria en primeira convocatoria e tratar nela os asuntos que figuraban na orde do día.

Asiste a interventora, dona Mónica Legaspi Díaz, e dá fe do acto, o secretario xeral, don Francisco Cacharro Gosende.

Unha vez aberta a sesión pola Presidencia á mencionada hora, e despois do correspondente estudo e deliberación, adoptáronse os seguintes acordos:

1.- ACTA DA SESIÓN ANTERIOR, ORDINARIA, DO DÍA 20 DE FEBREIRO DE 2015.- Unha vez examinada a acta da sesión ordinaria que tivo lugar o día vinte de febreiro de dous mil quince, a **Xunta de Goberno** da Deputación **acordou**, por unanimidade, a súa aprobación, sen observacións.

2.- APROBACIÓN DAS BASES REGULADORAS DA CONVOCATORIA DA XXXIV EDICIÓN DO PREMIO BLANCO-AMOR DE NOVELA LONGA.- Ante a necesidade de proceder á convocatoria da **XXXIV edición do Premio Blanco-Amor de novela longa**, unha vez vista a proposta de bases elaborada polos servizos provinciais, e de conformidade coa proposta favorable da Presidencia, a **Xunta de Goberno**, por unanimidade, **adopta** o seguinte **acordo**:

1º.- Aprobar as referidas bases e convocar o Premio Blanco-Amor de novela longa, consonte coas seguintes cláusulas:

Primeira.- Poderán participar nel todos os autores e autoras que presenten unha ou varias obras escritas en lingua galega segundo a normativa oficial.

Segunda.- As novelas terán unha extensión mínima de 150 folios mecanografados ou escritos en ordenador (fonte Times New Roman, tamaño de fonte 12) a unha soa cara e a dous espazos, ou de 75 folios mecanografados ou escritos en ordenador (fonte Times New

Acta da Xunta de Goberno correspondente ó 27 de febreiro de 2015

Roman tamaño de fonte 12) a dúas caras e a dous espazos. Achegaranse tamén en soporte informático.

Terceira.- As obras presentadas terán que ser inéditas.

Cuarta.- De cada obra presentaranse cinco copias asinadas cun lema, en paquete sen remite, dirixido á Deputación de Ourense, rúa Progreso nº32, 32003 Ourense, facendo constar no exterior “Para o XXXIV Premio Blanco - Amor”. Nun sobre anexo, pechado e baixo o mesmo lema, indicaranse o nome e enderezo do autor ou autora e, de ser posible, o seu teléfono e enderezo electrónico.

Quinta.- O prazo de admisión dos orixinais rematará o luns 14 de setembro de 2015, cento dezaioito aniversario do nacemento en Ourense de Eduardo Blanco-Amor.

Sexta.- O xurado do premio, nomeado nesta convocatoria pola Deputación de Ourense, estará composto por cinco membros de recoñecido prestixio no ámbito da cultura galega. Facúltase ao xurado para a interpretación e integración das posibles lagoas nas presentes bases en todo o relativo á concesión do premio.

Sétima.- O premio estará dotado con 12.000 €.

Oitava.- O premio poderase declarar deserto de non existiren obras de calidade adecuada a xuízo do xurado.

Novena.- O xurado fará público o seu veredicto, perante os medios de comunicación, o venres 27 de novembro de 2015.

Décima.- A concesión do premio implicará a cesión á Deputación do dereito exclusivo para a realización dunha primeira edición en lingua galega da obra. A dita edición deberá realizarse nun prazo máximo de dous anos dende a data da entrega do premio, quedando sen efecto a cesión no caso de que no dito prazo non se leve a cabo, agás que a demora se deba a causa imputable ao autor, suposto no que o prazo do dereito de edición se entenderá prorrogado polo tempo correspondente á dita demora.

As obras non premiadas devolveránselles aos/ás autores/as que o soliciten nun prazo dun mes contado dende o día do veredicto. En caso de non recollese dentro deste prazo os orixinais serán destruídos.

Décima primeira.- A entrega do premio terá lugar nun acto literario organizado pola Deputación de Ourense, o martes 1 de decembro de 2015, trinta e seis cabodano do autor de *A Esmorga*.

Acta da Xunta de Goberno correspondente ó 27 de febreiro de 2015

Décima segunda.- O feito de concorreren a este premio presupón que os/as autores/as aceptan as presentes bases.

2º.- A convocatoria deste premio publicarase no BOP e na sede electrónica da Deputación Provincial.

3.- APROBACIÓN DE SUBVENCIÓN Ó CONCELLO DE ESGOS.- No Pleno de data 31 de outubro de 2014 acordouse aproba-lo orzamento xeral para o ano 2015. Na base 88 do capítulo XIV figura con carácter nominativo, para a súa concesión directa, de acordo co artigo 22.2 a) da Lei 38/2003, xeral de subvencións, unha subvención de 30.000,00 euros a favor do Concello de Esgos, para a optimización enerxética de instalación de iluminación pública, con cargo á aplicación orzamentaria 450.12/762.01.

Unha vez vista a solicitude de subvención formulada polo alcalde do mencionado concello, comprobado pola Sección de Subvencións que a dita solicitude cumpre co establecido na lexislación de subvencións e nas bases de execución dos orzamentos, e de conformidade coa proposta favorable da Presidencia, a **Xunta de Goberno**, por unanimidade, **acorda** aprobar unha subvención ó Concello de Esgos, nos seguintes termos:

-Importe: 30.000,00 euros.

-Obxecto: optimización enerxética de instalación de iluminación pública.

-Xustificación: a subvención xustificárase mediante a presentación de conta xustificativa simplificada, todo isto de conformidade co que dispoñen os artigos 30 e 31 da Lei xeral de subvencións e o artigo 75 do Regulamento da antedita lei, á que se lle unirán os orixinais das facturas ou dos correspondentes documentos de valor probatorio equivalente, debidamente aprobados polo órgano correspondente.

Ó abeiro do establecido no artigo 31.2 da Lei xeral de subvencións, considerarase como gasto efectivamente realizado aquel cuxa obriga de pago fose contraída antes do vencemento do prazo de xustificación da subvención. En consecuencia, non será preciso acredita-la realización do pago na conta xustificativa. Non obstante o anterior, e no exercicio das súas facultades de control financeiro, a Intervención poderá realizar procedementos simplificados de control financeiro, consistentes en esixir, a partir do mes seguinte ó do pago da subvención, a acreditación do pago da totalidade dos gastos incluídos na conta xustificativa. O incumprimento desta obriga dará lugar á obriga de reintegro por parte do beneficiario, así como á imposición das sancións que procedan.

Acta da Xunta de Goberno correspondente ó 27 de febreiro de 2015

-Prazo xustificación: ata o 25 de maio de 2015.

4.- ASUNTOS DE URXENCIA.- Non se suscitaron.

5.- COMUNICACIÓNS DA PRESIDENCIA.- Non houbo.

6.- ROGOS E PREGUNTAS.- Non se formularon.

E, ás dez horas e vinte minutos, do referenciado día vinte e sete de febreiro do ano dous mil quince, a Presidencia dá por rematada a sesión da Xunta de Goberno, e redáctase esta acta, que se asinará segundo o legalmente establecido.

O PRESIDENTE,

O SECRETARIO,